

**Ме́сяца ма́рта в 6-й день
и ме́сяца ма́я в 29-й день
(обрéтение мо́щей)
Преподо́бнаго Йо́ва А́нзерскаго
Моли́тва 1**

О преподо́бне и богонóсне óтче наш Йо́ве! Пусты́ни А́нзерския безмо́лвный обита́телю, обе́тов мона́шеских и́стинный ревни́телю, а́нгелов любéзный собесéдниче, и́ноков по Бо́зе ве́рный наста́вниче! Чúдно житиé твоё, неисчи́слими по́двизи твои́, ве́лие пред Бо́гом дерзнове́ние твоё! Мо́лим тя, избра́нниче Христо́в, посети́ немощствую́щия ду́ши на́ша, простри́ о нас тёплую к Бо́гу моли́тву твою́, оградí заступле́нием твои́м обите́ль, тебе́ во изгна́нии прии́мшую и на безмо́лвие тебе́ подви́гшую. Ты неуста́нно в покая́нном пла́чи пребыва́вый, помози́ нам, погиба́ющим в нечу́ствии и окая́нстве, твои́м благода́тным предста́тельством отвёргнутися вся́кия грехо́вныя скве́рны и плоды́ и́стиннаго покая́ния Го́споду принести́. Ты, украси́вый собо́ю сонм и́ноков солове́цких, украси́ на́ше ску́дное житиé, призыва́я на нас благослове́ние

Бо́жие, да оста́вивше вся до́лу влеку́щая, обратим мы́сленная о́чеса наша к Бо́гу и и́стинных Небе́сных благ наслади́мся. О, досточу́дне Йо́ве, во смире́нии твоём возвели́чивыйся и нището́ю твоёю обогати́выйся! Умоли́ Христа́ Бо́га смире́нием ду́ши на́ша украси́ти, оскуде́вшая серде́ца на́ша Небе́сными дарова́нии испо́лнити. Сподо́би нас нищету́ Христо́ву возлюби́ти и стяжа́ния Еди́наго Ду́ха Свята́го в се́рдце своём при́сно желáти. Ты, до конца́ за́поведь Бо́жию о любви́ испо́лнимый, недугующим и стра́ждущим со усер́дием вы́ну служи́вый и велию́ любóвь к лю́дем до послéдняго издыхания в се́рдце носи́вый, научи́ и нас сей вя́щей добродéтели, да излиёт Господь, яко от приснотеку́щаго исто́чника в обнища́вшая серде́ца на́ша, капли Божественнаго мира Своея́ Божéственныя любв́е.

Ей, досто́блаже́нне Йо́ве, моли́твенниче к Бо́гу усер́днейший и благоприя́тнейший, глуби́ною серде́чною сокрове́нныя та́йны Бо́жия созерца́ти сподобивыйся, научи́ нас тёплая и сокруше́нная моле́ния к Тому́

простира́ти, Имя Его́ Сладча́йшее в се́рдце
при́сно благода́рно храни́ти.

Мо́лим тя, преблагі́й о́тче, богоуго́днаго
жити́я твоего́ ра́ди сподо́бившагося
посеще́ния Ма́тере Бо́жия, и повеле́ние
оби́тель Распя́тию Христа́ Бо́га созда́ти от
Нея́ прии́мшаго, испроси́ нам твоёю
благомо́щною моли́твою То́я теплое
заступле́ние и покрóв. Не отлуча́йся нас, раб
твоих, ве́рою тебё моля́щихся и во
благовре́менную по́мощь тя призыва́ющих.
Моли́ за Церковь нашу и за оби́тели святы́я
сия, да процветает в них святы́ня Госпо́дня,
да не умо́лкает в земли нашей глас
воспева́ющих Бо́га, Емúже подобает сла́ва,
честь и поклонё́ние во ве́ки веко́в. **Ами́нь.**

Текст службы утвержден решением Священного
Синода от 28 декабря 2018 года (журнал № 126).

